

08 DEC 1997

DR MAHATHIR BERLEPAS KE TEHRAN

KUALA LUMPUR, 8 Dis (Bernama) -- Perdana Menteri Datuk Seri Dr Mahathir Mohamad berlepas ke Tehran hari ini untuk menghadiri sidang kemuncak pemimpin-pemimpin Pertubuhan Persidangan Islam (OIC) di Iran.

Dr Mahathir diiringi isterinya Datin Seri Dr Siti Hasmah Mohd Ali dan persidangan tiga hari itu akan bermula esok.

Turut berada di Lapangan Terbang Sultan Abdul Aziz Shah di Subang, di sini, untuk mengucapkan selamat jalan ialah Menteri Penerangan Datuk Seri Mohamed Rahmat, Menteri Pengangkutan Datuk Seri Dr Ling Liong Sik, Menteri Pertahanan Datuk Syed Hamid Albar, Menteri Pembangunan Usahawan Datuk Mustapa Mohamad, Menteri Pertanian Datuk Amar Dr Sulaiman Daud, Menteri di Jabatan Perdana Menteri Datuk Dr Abdul Hamid Othman, beberapa Timbalan Menteri dan orang-orang kenamaan lain.

Selain menghadiri sidang kemuncak ke lapan pertubuhan itu Dr Mahathir dijangka mengadakan pertemuan dengan ketua-ketua kerajaan yang hadir bagi membincangkan isu-isu semasa. OIC mempunyai 55 negara anggota.

Semalam, Perdana Menteri berkata beliau tidak akan mengemukakan sebarang syor khas bagi memperkukuhkan kerjasama di kalangan negara-negara anggota OIC.

Ketika ditemubual oleh Agensi Berita Republik Islam Iran (IRNA) baru-baru ini, Dr Mahathir berkata OIC perlu berbuat lebih banyak lagi untuk memperkukuhkan perpaduan di kalangan negara-negara Islam.

-- BERNAMA

AH PR